



Fundasaun Mahein (FM), 30 Maiu 2018

Komunikadu Imprensa

Relatóriu Observasaun Eleisaun Parlamentar/Eleisaun Antecipada 2018 Loron 12 Maiu 2018

Iha periodu Eleisaun Antecipada 12 Maiu 2018 Fundasaun Mahein (FM) observa katak eleisaun la'o ho hakmatek no ofisial sira eleitoral nian hala'o nia kna'ar ho diak tuir prosesu tomak votasaun nian. Votante sira partisipa ho livre no seguru, no hetan seguransa maximu husi Polísia Nasional Timor-Leste (PNTL) tuir lei. Maske nune'e, FM rejista mos failansu balu ne'ebé akontese durense periodu eleisaun nian.

Iha âmbito seguransa nian servisu koordinada ida ne'e entre PNTL ho F-FDTL no bainhira involve F-FDTL iha sguransa interna. Nune'e involvimentu F-FDTL nian iha seguransa interna tenke liu husi Dirativa Ministerial ida ne'ebé hasai husi Ministériu Defeza hodi hato'o ba ulun boot F-FDTL nian hodi ezekuta. Nune'e atu ezekuta Dirativa Ministerial ne'e tenke ho Regra Empeñamentu ida hodi define tarefa sira ne'ebé sei empeña husi membru sira F-FDTL iha âmbito seguransa interna nian. Maske nune'e la iha informasaun lolos kona-bá asuntu ne'e. Maibe durante periodu eleisaun FM nia observasaun nota katak membru F-FDTL sira hala'o nia kna'ar ho profesional no tuir konduta sira eleisaun nian.

Kampaña ho arte-marsiais ilísitu sira, antes no durante kampaña eleisaun nian husi partidu no koligasaun sira, asuntu arte-marsiais hanesan asuntu ida ne'ebé utiliza hodi dada simpatia membru sira husi arte-marsiais nian no involve direta ho atributu arte-marsiais nian. Maibe tuir Rezolusaun Governu N.º 16/2013 kona-bá Extinsau ba Arte-Marsiais taka total arte-marsiais tolu. Ikus mai Lei N.º 5/2017 kona-bá Regime Jurídico Relativo à Prática de Arte Marciais, Rituais, Armas Brancas, Rama Ambon e Quinta Alteração ao Código Penal kriminaliza atividade arte-marsiais ilísita sira nian no artigu 5 husi lei refere proibidu arte-marsiais ligasaun ka involve direta ka indereta iha partidu polítiku ka asosiasaun polítika ruma.

Transmissaun direta ba kampaña FRETILIN no AMP hodi hato'o nia programa ba eleitor sira liu husi televizaun. Maibe propaganda eleitoral ne'ebé transmite direta husi televizaun la'os deit hato'o programa maibe hahu ho insulta no atake pesoal sira entre lideransa partidu rua ne'e nian durante sira nia komisiu. Iha ne'e mosu presepsaun oin-oin katak Eleisaun Antecipada hanesan "konfliktu entre katuas sira" no iha presepsaun seluk mos katak kompetisaun entre "Frente Armada ho Frente Diplomátiku". FM nia observasaun nota katak ida ne'e hanesan faktu ida ne'ebé halekar ona iha palku komisiu nian no militante ka simpatizante sira promove maka'as iha media sosial. Maske CNE bolu atensaun bebeik ba lideransa FRETILIN no AMP nian hodi hapara linguajen kro'at sira ne'e. Maibe lideransa FRETILIN no AMP kontinua no hetok sai manas liu tan to'o kampaña ramata.

Loron votasaun nian, observasaun FM nian nota katak iha Dili ofisiais sira votasaun balu la autoriza observador nasional FM nian hodi vota tamba tuir lista observador organizasaun FM la hakerek iha lista ne'ebé sira simu husi STAE. Maibe ofisiais sentru votasaun seluk nian autoriza observador nasional sira FM nia bele vota tamba iha lista adisional seluk hodi rejista orgzanizasaun ne'ebé observador sira hala'o nia kna'ar ba, ne'ebé hetan ona akreditasaun husi STAE. FM nota katak ofisiais sira votasaun nian balu ladun komprende didiak kona-bá observador nasional sira bele vota iha sentru votasaun ne'ebé deit iha teritoriu tomak tuir desizaun STAE nian no lei premitite.

Rezultadu eleisaun antesipada hatudu ona AMP hanesan partidu ka aliansa ida ne'ebé maioria absoluta iha parlamentu ho kadeira 34 husi total kadeira 65. Rezultadu ida ne'e possibilidade AMP bele forma mesak governu tamba asegura ona maioria iha parlamentu. Iha ne'e observasaun no diskusaun oin-oin husi públiku kona-bá governu ne'ebé AMP sei forma dura ka lae? Maske Tribunal Rekursu foin proklama rezultadu ofisial maibe diskusaun sira nune'e la'o namanas tiha ona no konsentra iha maioria datoluk rua (2/3) bainhira iha kazu ruma ne'ebé Prezidente Repúblika veta tuir artigu 88 Konstitusaun iha materia sira ne'ebé previstu iha artigu 95 Konstitusaun nian tenke husu apresiasaun foun husi parlamentu. Nune'e maioria datotoluk rua (2/3) sai polêmika iha sosiedade nia leet no halo interpretasaun tuir idak-idak nia komprensaun. Interpretasaun *Primeiru*, votu konfirmasaun ho maioria datoluk rua (2/3) husi deputadu sira ne'ebé prezente katak tenke konfirma ho votu 43 husi total deputadu 65. Interpretasaun *segundu*, votu konfirmasaun ho maioria datoluk rua (2/3) husi deputadu sira ne'ebé prezente katak maioria datoluk rua (2/3) husi deputadu sira ne'ebé marka prezensa iha plenaria naran katak aprova ho votu maioria. Mesmu deputadu sira seluk ka opozisaun la marka prezensa iha plenaria. FM fiar katak polêmika sira nune'e sei kontinua no bainhira mosu kazu sira hanesan temi liu daudauk iha leten ne'e.

Rekomendasaun

1. Rekomenda ba orgaun sira Estadu nian ne'ebé previstu iha artigu 150 Konstitusaun, hanesan deputadu sira Parlamentu Nasional, Primeiru-Ministru, Prokurador Jeral Repúblika, Provedoria Direitus Humanus no Justisa (PDHJ) ezerse nia kompetensia bainhira iha kazu veta ba diploma ruma ne'ebé previstu iha artigu 95 Konstitusaun husi Prezidente Repúblika ho polêmika datoluk rua (2/3) votu konfirmasaun deputadu sira nian.
2. Rekomenda ba lider partidu polítiku sira kontinua ho komunikasaun ida ne'ebé garante paz no estabilidade durante formasaun governu nian.
3. Rekomenda ba públiku tomak simu rezultadu eleisaun ne'ebé liu dadauk ne'e maske konkorda malu ka la konkorda malu durante kampañia eleisaun nian.
4. Rekomenda ba STAE presiza tau atensaun ba frakeza sira ne'ebé identifika hodi mellora servisu orgaun eleitoral nian iha eleisaun sira tuir mai.

5. Rekomenda ba autoridade sira seguransa nian kontinua servisu ho independente hodi aseguara posse ba deputadu sira V Lejislatura no formasaun governu ba VIII Governu Konstitusional ne'ebé besik dadauk ne'e.

Atu hetan informasaun kle'an liu kona-bá asuntu ne'e bele kontaktu:

Nélson Belo

Diretor Ezekutivu

Email: direktor.mahein@gmail.com

Telemovel: (+670) 78316075 ka 77561184

Website: www.fundasaunmahein.org